



Gabinete Wever - Croes II



# ISLAONLINE

Noticia di Gobierno

2023

Diahuebs 30 Maart 2023

Email: [IslaOnline@gobierno.aw](mailto:IslaOnline@gobierno.aw) Tel: 528-4952

**2023**  
**AÑA DI**



**UNION**  
**Y POSITIVISMO!**



@IslaOnline2023





## ARUBA A HACI TREMENDO PAPEL NA NACIONNAN UNI Y AWOR MUNDO TAMBE TA MIRA E SERIEDAD RIBA E TEMA DI AWA



Siman pasa a tuma luga e conferencia tocante awa “UN Water Conference 2023”, organisa door di Hulanda y Takijistan. Prome Minister Evelyn Wever - Croes y Minister Ursell Arends a atende e conferencia aki, caminda cu a elabora riba e importancia di awa pa Aruba y tur esfuerzo cu Aruba ta haci den cuadro di esaki. E siman aki durante Conferencia di Prensa di Gobierno Prome Minister a elabora riba con e conferencia a bay.

Aruba tin bon calidad di awa potabel y tur hende tin acceso na awa pa bebe, cual ta algo cu hopi pais no tin. Prome Minister Wever - Croes a duna di conoce cu esaki ta un compromiso cu a reitera, pues lo percura pa tin awa accesibel pa tur hende. Ademá, hecho ta cu Aruba ta rondona di lama cual ta importante pa nos pilar economico cual ta turismo. Sinembargo, ta tuma nota cu tin pais cu no ta tuma esaki na serio y consecuentemente ta mira hopi polucion den awa cual no ta wordo ocasiona na Aruba, pero ta laba bin riba nos beachnan. Esaki ta un punto cu a para keto na dje durante e conferencia.

Prome Minister Wever - Croes a splica tambe cu ta reconoce cu tin trabou pa haci ainda na Aruba pa loke ta situacion di awa. Un di e retonan aki ta cu e planta di purificacion di awa sushi / Rioolwaterzuiveringsinstallatie (RWZI). Minister Glenbert Croes y Minister Ursell Arends ta atendiendo cu privatisacion

di e planta pa asina por pone mas inversion y mihor atencion na dje. Un otro reto cu a wordo treci dilanti den e conferencia ta cu na Aruba, falta un maneho pa captura awa di yobida cual actualmente no ta tuma luga optimalmente.

Prome Minister a agrega bisando cu Minister Ursell Arends a haci un tremendo papel den representa Aruba y su compromisonan y Aruba a saca cara den esaki.

Apart di a representa Aruba na e conferencia, Prome Minister Wever - Croes tabatin e encargo di Presidente ex Officio di e conferencia, cual kiermen guia y presidi e conferencia na cierto momentonan durante e tres dianan. Esaki ta un gran honor pa Aruba, di por ta riba e tarima di mas halto na Nacionnan Uni y haya e reconocimiento di paisnan grandi y mas poderoso na mundo.

Finalizando, Prome Minister a expresa cu Aruba a haci un tremendo papel durante e conferencia y aworaki mundo tambe ta mira cu Aruba ta tuma e cosnan aki na serio. Ta bunita pa mira e gradicimento y reconocimiento cu ta bin di otro paisnanan, pa loke ta e trabounan grandi cu a haci na Aruba.

‘E tabata un bon conferencia y esnan cu a organisa a haci un bon trabou cu esaki. Mi a bin bek cu un curason mas trankil mirando cu otro paisan tambe ta realisa e importancia di awa, mescos cu nos ta reconoce akinan na Aruba. Cual ta duna un poco mas espacio pa sigui traha pa e pueblo di Aruba.’





**Prome Minister Evelyn Wever - Croes:**

# **DRENTANDO TEMPORADA DI CAMPAMENTO BAN CORDA PA CUIDA NOS PLAYA NAN Y NATURALES**



vision cu gobierno tin di basta tempo caminda cu ta inverti den e playanan. Pesey algun aña pasa a bin cu un proyecto pa drecha y mantene e beachnan y patrimonionan historico y nacional. Prome cu Eagle Beach, a traha riba proyecto Arashi y Boca Catalina, caminda cu a yena santo nobo unda cu tabata mester y a hacie mas amplio pa tur hende por gosa di dje.”

Aworaki drentando temporada di campamento, ta haci apelacion na un y tur pa gosa di naturalesa y nos playanan pero ban cuide tambe. A drecha e beachnan pa tur hende haci uzo di dje, awo ban percursa pa cuide pa asina tin hopi aña mas di goso y probecho di dje, Prome Minister a termina bisando.



Dentro di poco nos ta drenta e temporada conoci na Aruba di campamento. Den cuadro di esaki, Prome Minister Evelyn Wever - Croes kier recorda comunidad riba e importancia di nos beachnan. Ban cuida nos naturalesa pa nos por gosa di dje pa hopi aña mas.

Poco tempo pasa Eagle Beach Aruba a gana un reconocimiento di Tripadvisor, como e playa number 1 den Caribe y number 2 na mundo. Eagle Beach ta un playa sumamente importante pa Aruba su turismo, e ta bunita, e ta amplio y e ta un sitio cu tur hende por bay relaha. E reconocimiento di Eagle Beach ta algo cu a logra hunto como comunidad, y pues e ta hopi importante pa hunto sigui mantene, y percursa cu e ta keda e bunita beach manera cu e ta, Prome Minister Wever - Croes a expresa.

“E reconocimiento aki no a bin di su mes, el a bin como resultado di un





**Prome Minister Evelyn Wever-Croes:  
Hunto cu Minister di Finansas,**

# **PROME MINISTER LO TA NA HULANDA PA FIRMA E ONDERLINGE REGELING Y PA TRATA E LEY DI RAFT**

**"Mi ta duna hopi reconocimiento na Secretario di Estado Alexandra Van Huffelen pa yuda yega na e acuerdo aki"**



Diahuebs mainta den conferencia di prensa di Gobierno di Aruba, Prome Minister Evelyn Wever-Croes a anuncia cu e onderling regeling lo wordo firma diamars awo, dia 4 di april na Hulanda. Diahuebs atardi, Prome Minister a informa Parlamento di e ultimo detayenan.

Prome Minister a indica cu lo bay tin un conferencia di prensa despues na Hulanda pa informa comunidad henter di Reino di kico tur a yega na dje den e onderlinge regeling.

"Mi ta considera esaki un paso grandi y mi ta duna hopi reconocimiento na Secretario di Estado Alexandra Van Huffelen cu a duna oido pa scucha kico ta biba den e paisnan y cu tabata dispuesto pa nos a yega na otro acuerdo asina hunto cu Corsou y Sint Maarten. E paso grandi aki ta trece tranquilidad, un sistema di traha cu nos por biba cu n'e y nos ta sumamente orguyoso di a yega asina leu", Prome Minister a expresa.

Prome Minister a remarca tambe cu pa Aruba, otro siman tambe lo wordo trata e Rijkswet di Financieel Toezicht, e Raft cu ta e otro ley di Reino cu ainda ta riba mesa. Hulanda ta sigui insisti cu esaki ta importante pa nan, di banda di Aruba, Parlamento a indica cu nan no ta sostene e bachi di Rijkswet y den esey Aruba ta negociando na mesa. Pa e motibo aki tambe, Minister di Finansas Xiomara Maduro tambe lo viaha hunto cu Prome Minister pa Hulanda y cu e profesionalnan pa e negociacionnan aki. "Cu poder di Dios nos ta sali afo mas lihe cu ta posibel", Prome Minister a expresa.

Raft no ta para riba su mes, nan ta acopla cu e discucionnan riba e repago di e debe cu nos tin na Hulanda. Aruba debe Hulanda 916 milyon florin cu ta caduca e aña aki na october. "Mirando cu nos no tin e suma aki, nos lo mester yega na un arreglo di pago cu Hulanda riba esey y basa riba esaki e reunionann ta tuma luga. Nos lo mantene comunidad informa riba esaki", Prome Minister Evelyn Wever-Croes a duna di conoce.



## **Prome Minister Evelyn Wever-Croes: A finalisa e detayenan di onderlinge regeling**

# **DIAMARS 4 DI APRIL LO FIRMA NA HULANDA**

Un topico importante cu Prome Minister Evelyn Wever-Croes a elabora riba dje den conferencia di prensa di Gobierno di Aruba diahuebs mainta ta tocante e Onderlinge Regeling. Prome Minister a remarca cu na e momentonan aki ta asina leu na unda cu a yega na un acuerdo cu Hulanda riba e onderlinge regeling y COHO definitivamente lo wordo bari for di mesa.

Prome Minister a splica e situacion actual pa loke ta trata e onderlinge regeling. Pa haci esaki, Prome Minister a bay na e comienso di e pandemia, e mercado internacional na unda Aruba por a presta placa a cera pa Aruba. Pa yega na e fondonan pa mantene e pais, Aruba solamente por a presta placa for di Hulanda.

Despues cu Gobierno a bati na porta di Hulanda, Hulanda a indica cu nan ta dispuesto pa yuda pero a pone condicionnan. No a keda Aruba otro sino pa acepta e condicionnan aki di Hulanda. Dos condicion tawata e Ley COHO y e Ley di Raft. Ambos ta leyman di Reino. E COHO a rigi e relacion entre Hulanda y Aruba pa e reformanan di recuperacion di Aruba. Y Raft a rigi e supervision financiero na unda cu Hulanda tawata kier a haya mas grip mirando cuanto placa Hulanda a presta Aruba.

Gobierno di Aruba, na e momento dificil aki pa nos pais, a bay di acuerdo y total a haya 916 miyon florin presta di Hulanda durante di e pandemia. Cu e placa aki, a mantene operacion di tanto Gobierno y sector priva. Cu e fondo a paga FASE cu a yuda esnan cu a perde trabou durante pandemia. Cu e fondo a paga e Proyecto di loonsubsidie cu a yuda e doñonan di trabou pa mantene mas tanto trahado posibel riba payroll. Tambe a uza e fondo pa e sosten cu a wordo duna na e empresanan chikito y mediano na Aruba y otro asistencianan financiero cu Gobierno a duna durante ful e periodo. Esaki, sin conta tur gasta adicional cu e pandemia a trece cu ne, entre otro, gasto di salud, cuido intensivo, vacunacion. A base di esaki, Hulanda a pidi cu pa medio di un Rijkswet, yega na un areglo di Reino y con Aruba lo sali mas fuerte y resiliente despues di e pandemia.

Prome Minister a indica cu pa Aruba, e contenido di e reforma no tawata asina un problema mirando cu Aruba mes a indica caba cua ta e areanan cu lo mester traha riba dje si nos kier sali mas fuerte y resiliente. "Pa Hulanda e tawata importante den ki bachi nos lo hinca esaki". Aki ta unda cu e tema di COHO a bin na vigor. COHO lo ta e organo cu lo mester a bin cu lo a consisti di tres persona pa tuma decision den ki area lo bay implementa e reformanan na Aruba. E tres personanan aki lo no mester a responsabilisa nan mes ni na Gobierno di Aruba ni na Gobierno di Hulanda. "COHO lo tawata un instancia di tres persona cu Hulanda lo a apunta pa dicide e maneho. Nos tawata tin problema con e manera cu esaki a wordo geset



pasobra no por pasa desicionnan asina importante den man di tres persona cu Gobierno di Aruba mes no por apunta y no lo tin influencia riba dje y e tresnan aki lo no ta duna responsabilidad na ningun otro hende. A base di esaki, nos a presenta un otro alternativa". Prome Minister a duna di conoce.

Na juni aña pasa, Premiernan di Aruba, Corsou y Sint Maarten a reuni cu Secretario di Estado Van Huffelen na unda cu a negocia y Aruba a presenta un otro alternativa pa enbes di bin cu COHO, bin cu un onderlinge regeling. Un acuerdo hopi mas balansa pa ehecuta e reformanan. Corsou y Sint Maarten a sostene e proposicion aki di Aruba y a haci palabracionnan cu lo bay traha mas extenso riba dje.

Na januari 2023 na Sint Maarten, a tuma e luga e siguiente reunion di e 4 paisnan di Reino na unda cu a dicide cu e alternativa cu a wordo presenta ta bira e alternativa final na unda cu lo mester a finalisa algun detaye. Awo ta asina leu cu a finalisa e detayenan y COHO na unda 3 persona lo tuma decision a wordo bari y na su luga a bin e onderlinge regeling, un sistema na unda cu Gobierno di Aruba y Prome Minister cu ta encarga cu e reformanan, ta responsabilisa su mes na Parlamento, e Minister di BZK na Hulanda ta responsabilisa su mes na su Parlamento. Cada ken ta traha hunto cu un ekipo cu ta encarga cu e ehecucion di e landspakketnan y reformanan y ta traha hunto pa yega na palabracionnan.

"Gobierno di Aruba tin plannan di kico nos kier haci. Hulanda a compromete cu e ta pone fondo disponibel pa nos ehecuta e plannan aki. Aworaki nos ta yegando na e final di e onderlinge regeling y esaki lo wordo firma otro siman diamars 4 di april na Hulanda", Prome Minister Evelyn Wever-Croes a duna di conoce.

Prome Minister diahuebs a informa Parlamento di tur ultimo detaye.





## **CURSO 'EDUCA CU CULTURA' Y 'DESCRIPCION Y MANEHO DI PROYECTO TA WORDO DUNA PA FACILITA PROCESO PA YEGA NA FONDO PA PROYECTONAN CULTURAL RIBA TOPICO DI SCLAVITUD**

**Un total di 14 participante ta haya informacion valioso pa pone den practica**

Diabierna siman pasa, Minister Maduro di Cultura tabata presente na inicio di e curso 'Educa cu Cultura' y 'Descripcion y Maneho di Proyecto' cu ta wordo facilita den tres mita dia pa Comision Conscientisacion di Sclavitud den colaboracion cu UNESCO Aruba y UNOCA.

E curso ta wordo facilita pa por duna e participante un bista di e maneho di cultura en general, y con pa describi y maneha un proyecto. Kier logra pa e participante por ta bon prepara na momento di aplica pa haya sosten financiero na un di e fondonan Hulandes disponibel pa por realiza proyectonan, specialmente esnan cu ta trata sclavitud na Aruba.

Minister Maduro ta gradici sra. Marushka Tromp y sra. Ruby Eckmeyer di UNESCO Aruba y tambe sra. Ray-Anne Hernandez di UNOCA cu a pone nan tempo disponibel pa duna e curso aki cu a conta cu 14 participante. E mandatario tin e confiansa cu na final di e curso, esnan presente lo por bay describi y maneha nan proyecto hopi mas miho. 'Nos ta spera cu fo'i di Aruba hopi peticion por wordo entrega y aproba cerca e fondonan Hulandes disponibel pa asina por concretisa e proyectonan na bienestar di cultura na Aruba,' tabata palabranan di e mandatario. Minister Maduro ta desea tur participante hopi exito y ta gradicinan pa e esfuerso y aporte pa engrandece nos cultura.





# MINISTER XIOMARA MADURO A CELEBRA HUBILARIO DI TRES EMPLEADO PUBLICO NA ARCHIVO NACIONAL ARUBA

**Nan conocimiento, contribucion y experiencia tabata primordial den  
e desaroyo di e memoria colectivo di nos Pais**



E siman aki Minister Xiomara Maduro bou di cual Archivo Nacional Aruba ANA ta resorta, a celebra hubilacion di tres empleado publico trahando. Ta trata aki di Sr. Raymond Hernandez, Sr. Mirto Tromp y Sr. Nelson Tiel.

Sr. Raymond Hernandez, cu ta e actual director di di ANA a cumpli 30 aña di hubilacion y Sr. Mirto Tromp y Sr. Nelson Tiel ambos a cumpli 40 aña di hubilacion. 'Danki pa boso trabou duro, boso conocimiento comparti y tur esfuerzo cu boso a bin ta haci diariamente pa eleva nos Archivo Nacional. Boso contribucion ta di sumo importancia pa e memoria colectivo di nos Pais, no solamente pa nos den presente, pero sigur tambe pa e generacionan cu lo sigui nos.'

Minister Xiomara Maduro, den nomber di Gobierno di Aruba, ta duna un palabra di pabien na tur tres hubilario y ta gradicinan pa nan trabou haci pa Pais Aruba.







# "ARUBA SU GREEN HYDROGEN VALLEY" E VISION ENERGETICO DI MINISTER GLENBERT CROES Y GOBIERNO DI ARUBA LO TA E PROXIMO PILAR ECONOMICO DI ARUBA

Hidrogeno ta e energia di futuro, clave den decarbonisacion. Pa e futuro di e generacionnan cu ta sigui nos, awe nos mester tuma e pasonan pa sigura cu nan por tin un pais y un mundo limpi. Ta nos deber pa minimalisate yega na e punto di eliminacion total di HFO – Heavy Fuel Oil cu ta contaminador mas grandi di nos medio ambiente.

Humanidad tin hopi tempo uzando hidrogeno como materia prima den industria kimico y como combustibel. Pero pa motibo cu no por extrae hidrogeno directamente for di naturalesa den su estado mas puro, mester fabric'e. Y precisamente e metodo con ta extrae e hidrogeno ta determina si e ta un combustibel limpi y sostenibel.

## TUR E TIPONAN DI HIDROGENO

Bo tin hidrogeno blauw, hidrogeno berde.

### Hidrogeno blauw:

Esaki tambe bo ta obtene di fosilnan combustibel pero cu tecnicanan capas di captura y almacenacion e emisionnan CO<sub>2</sub>. E version blauw ta menos contaminante cu e version shinishi.


### Hidrogene berde:

Esaki ta e clase di hidrogeno cu ta logra obtene sin genera emision un hidrogeno sostenibel. Esaki ta e combustibel cu lo yuda mundo alcanza e meta di decarbonisacion total di nos planeta y den e lucha contra cambio climatico.

Hidrogeno berde ta e combustibel di futuro. E ta un forma di energia asina dinamico cu lo por aplica den tur e sectornan cu awendia ta depende di fosil 'heavy fuel oil'.

Esaki ta e meta final unda cu Minister Glenbert Croes kier yega cu Aruba Hydrogen Valley. Su vision ta pa logra un Aruba cu un medio ambiente limpi sin ningun clase di contaminacion.

Hidrogeno ta e futuro. Pero mester cuminsa awo. Y pa



Aruba e lo ta den un futuro cercano, manera e mandatario recientemente mes a anuncia riba su pagina di Facebook: E VISION PA TRANSFORMA E ZONA DI REFINERIA DEN E "ARUBA SU GREEN HYDROGEN VALLEY" PRONTO LO BIRA REALIDAD

"Loke kisas otro hende no a pensa posibel, nos ta bay haci realidad."



# MINISTER GLENBERT CROES A BISHITA HOTEL RIU PLAZA ESPAÑA

**"Nos ta orguyoso di tin hotelnan Riu na Aruba y ta agradecido pa tur e inversionnan haci den pais Aruba"**



Durante su bishita na Spaña, Minister di Energia Glenbert Croes a tuma e oportunidad di haci un bishita na Hotel Riu Plaza España, na unda el a wordo cordialmente ricibi pa e Director di Operacion sr Manuel Jaile y Director General sr. Javier Flórez Alzueta. Hotel Riu Plaza España ta un hotel emblematico na Madrid cu ta hopi popular y ta ofrece facilidadnan di calidad halto.

Mirando e exito na nivel mundial di e cadena di Riu Hotel, Gobierno ta sumamente orguyoso di por conta cu dos Riu hotel na Aruba. E mandatario a gradici nan pa tur e inversionnan haci



riba nos isla. Riu Antillas y Riu Palace na Aruba, ta percura pa constantemente mehora nan facilidadnan, pa asina semper ofrece e bishitantenan un lugar "all inclusive" di calidad halto. E relacion entre Gobierno di Aruba y Hotel Riu pa loke ta trata trahadonan y comunicacion en general ta uno positivo.

"Nos a expresa nos gratitud y felicidad di mira e exito y embergadura di e cadena Riu. Nos ta orguyoso di tin hotelnan Riu na Aruba y ta gradicinan pa tur e inversionnan haci den pais Aruba. Nos ta deseanan hopi exito y spera di por mira desaroyonan continuo y positivo." Minister Croes a expresa.



**DOW**



# DOW TA INFORMA

**Capa di asfalt a wordo poni na St Cruz y 2 verkeersplateau a wordo construi awe.**

**Verkeersplateau na Sabana Blanco 26C, dilanti Cas di mi Chepa y tambe na Sportparkstraat 8.**





# MINISTER THIJSSEN A REUNI CU HANZE HOGESCHOOL NA GRONINGEN



Durante di su bishita na Groningen, Minister Plenipotenciario mr. Ady Thijsen a probecha na bishita Hanze Hogeschool na Groningen y a reuni cu presidente di Hunta di Ehecutivo (RvB) sr. Dick Pouwels. Tambe presente na e reunion ta studiemmentor pa e region di Groningen, Leeuwarden y Emmen Donna van Heukelem-Kock.

Hanze Hogeschool na Groningen ta un hogeschool hopi “breed”. Nan enfoke ta riba cuater tema: crea un ambiente di biba den e parti norte di Hulanda cu ta sostenibel y bon pa biba. Otro temanan ta digitalisacion y salubridad activo. Por ultimo tambe nan ta concentra riba e tema di transicion di energia. Hanze Hogeschool tin cooperacion cu otro institutonan di enseñansa, manera Universidad di Groningen, NHL Stenden Hogeschool na Leeuwarden, Hogeschool van Hall Larenstein tambe na Leeuwarden y UMCG Groningen, cu ta e hospital academico di Groningen. Riba tereno internacional Hanze Hogeschool tin cooperacion cu diferente universidadnan na Alemania, Spaña, Irlanda, Suecia, Portugal, Chekia y Polonia.

Minister Thijsen a bisa den e combersacion cu su meta ta pa mira riba cual tereno por bin cooperacion entre Hanze Hogeschool y Aruba. Tambe e posicion di studentenan

Arubiano na Hulanda y Groningen en particular a bin dilanti den e encuentro. Mester mira si por crea cooperacion hunto cu partnernan commercial pa lanta espacio di trabao den e ramo di innovacion den e region di Groningen y tambe na Aruba. Mirando cu Hanze Hogeschool tin acuerdonan di cooperacion cu otro universidadnan, lo ta bon pa mira si por yega tambe na un cooperacion cu Universidad di Aruba. Tambe mester por check e posibilidad cu Aruba por fungi como HUB pa universidadnan den Latino America y Europa. Sr. Pouwels a bisa cu Hanze Hogeschool lo bai sondea posibilidad pa cooperacion cu Aruba. A palabra cu studiemmentor Donna van Heukelem-Kock lo sigi den combersacion cu Hanze Hogeschool riba esaki.

Minister Thijsen a gradici sr. Pouwels pa e recepcion y tambe pa e boluntad pa pensa y mira unda por bin cu cooperacion na bienestar di e studentenan Arubiano y tambe Pais Aruba.





# DIA 30 DI MAART 2023 TA E PROME BIAHA CU TA OBSERVA DIA INTERNACIONAL DI CERO DESPERDICIO

Mundialmente tin hopi atencion ta bay riba e problematica di desperdicio. Na Aruba nos tin añanan ta bataya e problematica aki y buscando posibel solucionnan pa atende cune na un manera sostenibel. Kico ta desperdicio? Esaki por ta un producto cu no tin uzo mas pe, a perde su funcion, tin partinan cu a dañá y no tin manera pa drech'e, of hende kier uno mas nobo, of no ta desea un producto menos atractivo cu e nobo. E consumidor ta cumpra y consumi productonan mes lihe cu e productornan ta produci mas producto y pone esakinan riba mercado. Tambe nos ta uza na Papiamento e palabra sushedad pa describi desperdicio. Pero e mundo su capacidad pa absorba tanto sushedad no por continua na e manera acelera cu e tin awor y ta p'esey Nacionannan Uni a declara 30 di maart como Dia Internacional di Cero desperdicio. Na Ingles- International Day of Zero Waste. Directie Natuur en Milieu (DNM) tin e tarea di informa comunidad riba temanan manera sushedad y desperdicio, pasobra sushi ta afecta directamente e calidad di nos medio ambiente y tambe naturalesa.

E dia aki ta un resolucian cu e Asamblea General di Nacionannan Uni a adopta dia 14 di december 2022. E dia aki tin apenas algun luna cu e ta ancra como dia Internacional di Cero Desperdicio. Nan a stipula dia 30 di maart tur aña como e dia pa conmemora esaki. E dia aki ta enfoca pa promove patronchi di consumo y produccion sostenibel. E patronchi di consumo cu ta promove cambio di pensamiento di sociedad pa ta mas circular. E dia ta pa promove conscientisacion y iniciativanan di cero desperdicio, con esakinan ta contribui na adelantonan pa alcanza e Agenda 2030 pa Desaroyo Sostenibel.

Aki tin algun factor di importancia pa menciona. E sector di desperdicio ta contribui significativamente na tres crisis cu e planeta ta enfrenta. Esakinan ta: cambio di clima, perdida di biodiversidad y naturalesa, como tambe polucion. Humanidad rond mundo ta genera un cantidad di 2.24 biyon ton di sushi solido tur aña di cual solamente 55% ta wordo maneha of controla den cierto tipo di facilidad adecua. Tur aña rond di 931 miyon di ton di cuminda ta bay benta afo y 14 miyon di ton di desperdicio di plastic ta drenta e ecosistema marino of den fluho di awa.

E mentalidad y iniciativanan di cero desperdicio ta pa minimalisa cantidad y preveni sushedad. E pensamentonan aki ta yuda atende e crisis planetario aki door di: proteha e medio ambiente, brinda seguridad di cuminda y drecha salud humano y aumenta bienestar. Kico ta encera pa adapta mentalidad of



bin cu iniciativanan di cero desperdicio?

E iniciativanan di cero desperdicio ta atende cu produccion responsabel, dispone di y consumo di productonan cu ta den cuadro di un sistema circular. Esaki ta nifica cu ta reuza y rescata mas tanto posibel recurso y cu ta minimalisa polucion di aire, tera y awa. Pa yega na cero desperdicio ta rekeri accion na tur nivel. Cua esakinan ta?

Productonan mester ta diseña pa ta duradero y cu ta rekeri poco of tin tiki impacto di material. Door di opta pa recursonan cu tin menos impacto of di produccion menos intensivo, fabricanan y productornan ta limita na nan turno polucion y desperdicio. Hasta door di promove y maneha e demanda pa producto, por yega na cero desperdicio den e ciclo di bida di un producto. Consumidornan tambe por tin un rol importante pa establece cero desperdicio door di cambia patronchi y habitonan manera reuza y drecha productonan mas cu por y asina extende bida di e producto, prome cu ta deshaci di dje.

E esfuerso di gobierno, comunidad, industria y otro stakeholders ta reconoce e potencial den iniciativanan di cero desperdicio. Con ta haci e esfuersonan aki? Door di reforza maneho di desperdicio y drecha procesonan cu productonan ta encamina, financiamiento di iniciativanan y formula maneho cu ta trata economia circular.



## Continuacion DIA INTERNACIONAL DI CERO DESPERDICIO....

Na Aruba nos por pensa riba e financiamiento na companianan cu ta enfoca riba drechamento di productonan pa duna esakinan un bida mas largo. Den e mundo di drechamento di auto esaki ta hopi visibel. Tin mecaniconan cu ta specialisa den diferente aspecto. Tin body shop pa saca sla ora e auto ta kibra y mecanico cu ta drecha e parti di motor. Tambe tin cu ta specialisa den drecha muffler, radiator, airco etc. Mescos por ta aplicabel pa otro productonan. Por ehempel e celular cu ta hib'e pa drecha pasobra e la kibra e screen of pasobra e tin problema di sistema y funcionamiento. Pero hopi ta bay tras di e productonan cu ta bin cu un producto mas nobo y asina e consumidor ta perde e gana di drecha e producto bieu y ta keda anhele e nobo te cu e ta cumpra e ultimo modelo di celular y no sa kico pa haci cu e bieu y ta deshaci di dje door bent'e afor. Hopi no sa cu e productonan aki tin componente cu tin balor.

E habito di consumo aki ta afecta e cantidad di sushedad cu ta crea. P'esey ta di elogia cu a bini cu maneho nobo cu ta manda desperdicio na diferente waste streams na Aruba. Nos a enfrenta esaki na comienso di aña cu e ceramento di e dump Parkietenbos. Por haya mas informacion di esaki riba e plataforma [www.trashtocash.com](http://www.trashtocash.com). Nos ta apenas cuminsando e caminda di cero desperdicio. Ta solamente cu bo accionnan y gana nos por logra. Nacionnan Uni, e paisnan miembro y stakeholders a forma un strategia global pa cu consumo y produccion sostenibel pa yuda guia e transicion aki. E strategia aki ta boga pa adopta consumo sostenibel y obhetivonan di produccion cu ta crusa diferente sector pa aña 2030. E meta di desaroyo sostenibel (SDG) #12 ta encera sigura patronchinan cu ta sostene consumo y produccion sostenibel. Pa mas informacion di e metanan mundial pa desaroyo sostenibel por



bishita e website [www.sdgaruba.com](http://www.sdgaruba.com).

DNM ta forma parti di e comision di SDG Aruba pa e parti di planeta di cual SDG #12 cu tambe ta relaciona di cerca cu asuntonan di naturalesa y medio ambiente. Nos ta apoya tambe iniciativanan, manera plastic beach party, Aruba life organics, Zero waste company Aruba, Arupro y hopi mas. Si ta desea di informa DNM di bo iniciativa cu ta aline cu SDG 12 y cero desperdicio por email nos na: [info@dnmaruba.org](mailto:info@dnmaruba.org). Feliz dia Internacional di Cero Desperdicio; abo a pensa caba con bo ta aporta na esaki?





Union ta importante pa cualkier sociedad pasobra e ta e base di forsa, poder, guia, curashi y desaroyo. Union ta provee un fuente constante di motivacion positivo y e ta e vinculo pa logronan grandi. Esey ta loke Aruba a demostra, den union y cu positivismo a logra recuperacion despues di varios crisis tras di otro.



2023

AÑA DI UNION Y POSITIVISMO! \_\_\_\_\_